

दिनांक 08.07.2024

समय: 18.45 बजे

### आकाशवाणी जयपुर-अजमेर

- राष्ट्रीय परीक्षा एजेंसी संयुक्त विश्वविद्यालय प्रवेश परीक्षा-2024 री उत्तर कुंजी जारी कीनी।
- राज्यपाल कलराज मिश्र पुलिस विश्वविद्यालय ने वां रा कोर्स ने बगत रे मुजब उपयोगी अर नुवो बणावण बाबत कह्यो।
- ऊर्जा मंत्री हीरालाल नागर कह्यो-प्रदेश ने सूरज री रोशनी ऊं बिजली बणावण अर इण ऊं जुडी मशीनां बणावण रा हलका मांय आगे लावण बाबत कह्यो।
- राज्य मांय कई ठोडा चौखो मेह बरस्यो- बांदीकुई अर भरतपुर मांय सब ऊं बत्ती 9 सेंटीमीटर बिरखा दर्ज करी ज्यी।

000

राष्ट्रीय परीक्षा एजेंसी संयुक्त विश्वविद्यालय प्रवेश परीक्षा-2024 री उत्तर कुंजी जारी कर दीनी है। विद्यार्थी उत्तर कुंजी माथे काल ताई आपत्ति दर्ज करा सके है। आ परीक्षा पहली दफा पेन-कागज अर कंप्यूटर दोन्यू री मदद ऊं लीरीजी ही। 15 विषयां सारु पेन-कागज ऊं जद के 48 विषयां री परीक्षा कंप्यूटर ऊं लीरीजी ही। ई साल 261 केंद्रीय, राज्य, डीम्ड अर गैर सरकारी विश्वविद्यालयां मांय स्नातक कोर्स मांय दाखिला सारु व्ही प्रवेश परीक्षा मांय सिरकत करण सारु तेरह लाख 40 हजार ऊं बत्ता विद्यार्थी नाम मंडाया हा। इम्तेहान रो नतीजो एक सप्ताह मांय जारी व्हेवण रा आसार है।

000

सर्वोच्च न्यायालय राष्ट्रीय पात्रता सह प्रवेश परीक्षा-नीट यूजी पेपर लीक मामला मांय केंद्र सरकार अर राष्ट्रीय परीक्षा एजेंसी- एनटीए ऊं अदालत मांय रपट दाखिल करण सारु कह्यो है। सुप्रीम कोर्ट केन्द्रीय अन्वेषण ब्यूरो-सीबीआई ऊं ई ई मामला मांय 10 जुलाई शाम ताई रपट पेश करण रा हुकम दीना। मुख्य न्यायाधीश न्यायमूर्ति डीवाई चंद्रचूड़, न्यायमूर्ति जे बी

पारदीवाला अर न्यायमूर्ति मनोज मिश्रा री पीठ नीट-यूजी परीक्षा ऊं जुड़ी अर्जिया माथे सुणवाई करता थका ए हुकम दीना ।

00000

सुप्रीम कोर्ट केंद्र सरकार ने महिला कर्मचारियां सारू मासिक धर्म अवकाश रा बारा मांय मॉडल नीति तैयार करण सारू कह्यो है । मुख्य न्यायाधीश न्यायमूर्ति डी वाई चंद्रचूड़, न्यायमूर्ति जे बी पारदीवाला अर न्यायमूर्ति मनोज मिश्रा री पीठ आज मासिक धर्म अवकाश नीति री मांग करण वाळी जनहित याचिका रो निपटारो करता थकां ऐ हुकम दीना ।

00000

प्रदेश रा न्यारा-न्यारा आकांक्षी जिलां अर ब्लॉक्स मांय संपूर्णता अभियान चलायो जा रह्यो है । अभियान रा तैत 6 मानकां स्वास्थ्य, पोषण, शिक्षा, कृषि, मृदा और सामाजिक विकास माथे खास ध्यान दियो जा रह्यो है । शाहपुरा रा जिला कलेक्टर रा राजेन्द्र सिंह शेखावत वठे चाल रह्या काम री जाणकारी दीनी-

-----

0000

राज्यपाल अर विश्वविद्यालयां रा कुलाधिपति कलराज मिश्र पुलिस विश्वविद्यालय ऊं अपराधां री जांच मांय कृत्रिम बुद्धिमता (एआई) काम लेवण सारू कह्यो है । वे जोधपुर मांय सरदार पटेल पुलिस, सुरक्षा अर दाण्डिक न्याय विश्वविद्यालय रा तीजा दीक्षांत समारोह मांय बोल रह्या हा । वे ई विश्वविद्यालय ने अपराध रोकण सारू 'थिंक-टैंक' रा तौर ऊं काम करण बाबत् कह्यो । राज्यपाल कह्यो के सूचना अर संचार प्रौद्योगिकी रा जमाना मांय साइबर अपराध समेत न्यारा-न्यारा अपराधां ने रोकण सारू 'स्मार्ट पुलिसिंग' री जरूरत है । वे कह्यो के संगठित अर साइबर अपराध रोकण सारू देश मांय न्याय ऊं जुड़्या तीन नुवा कानून लागू करी ज्या है जो न्याय री सोच ने मजबूत बणावे है अर ज्यां ऊं टेमसर न्याय मिल सकेला । राज्यपाल कह्यो के पहली दफा छोटा-मोटा अपराधां री सजा रा तौर ऊं सामुदायिक सेवा रो प्रावधान ई करी ज्यो है । वे पुलिस विश्वविद्यालय ने वां रा कोर्स मांय नुवा कानूनां री जाणकारी शामिल करण बाबत कह्यो । दीक्षांत समारोह मांय राज्यपाल 10 विद्यार्थियां ने सोना रा तमगा दे र नवाजा । विश्वविद्यालय द्वारा पहली बार 6 दीक्षार्थियों को पी.एच.डी की उपाधि दी गई । समारोह में गृह राज्य मंत्री जवाहर सिंह बेढ़म भी मौजूद रहे ।

0000

ऊर्जा मंत्री हीरालाल नागर कह्यो है के राज्य सरकार प्रदेश मांय सूरज री रोशनी ऊं बिजली बणावण रा हलका ने बधावो दे रही है । ऊर्जा मंत्री आज जयपुर मांय राजस्थान सोलर एसोसिएशन री ओर ऊं लगायी ज्यी भारत सोलर कंपोनेंट एक्सपो मांय बोल रह्या हा । वे पीएम कुसुम योजना रो फायदो लेवण

वाळा अर सूरज री रोशनी ऊं बिजली बणावण री मशीनां बणावण वाळा कारोबारियां सागे ई बातचीत कीनी। वे कह्यो के सौर ऊर्जा भविष्य री ज़रूरत है अर म्हाणा प्रदेश मांय सूरज री रोशनी बणावण ऊं जुड़ी मशीनां बणावण रा हलका मांय निवेश री अपार संभावनावां है।

000

राज्य रो माली साल 2024–25 रो पूरो बजट 10 जुलाई ने विधानसभा मांय पेश कर्यो जावेला। बजट रा बारा मांय जनता वां री उम्मीदां जताई है। भीलवाडा शहर रा कारोबारी अर जनता बिजली रो मोल कम करण समेत न्यारा–न्यारा मुद्दां माथे वां री उम्मीदां जताई।

-----

0000

सवाईमाधोपुर जिला रा रणथंभौर बाघ अभ्यारण्य मांय नर बाघ ज 58 रा शव रो आज राजबाग नाका परां छज्ज। रा नियमां रे मुजब दाग कर दियो ज्यो। ध्यानजोग है के ओ बाघ हिंदवाड़ गांव कने काल मर्यो मिल्यो हो।

0000

पाली रा सांसद पीपी चौधरी जोधपुर कने बिलाडा तहसील मांय वां रा गांव भावी मांय 'एक पेड़, मां के नाम' अभियान रा तैत बच्चां, गांव वाळा अर भारतीय जनता पार्टी रा कार्यकर्तावां सागे पौधा रोप्या। जयपुर री सांसद मंजू शर्मा ई जमवारामगढ़ कने वां रा गांव लाली मांय "एक पेड़ मां के नाम अभियान रा तैत पौधा रोप्या। शाहपुरा जिला मांय फूलियाकलां उपखण्ड री देवरिया ग्राम पंचायत मांय विधायक लालाराम बैरवा एक पेड़ मां के नाम अभियान री सरूआत कीनी। ई मौके वे पौधा रोप र वां री सार–संभाळ री शपथ दिरायी। कार्यक्रम रे दौरान किसानां ने टोर्च, खिलाडियां ने खेल सामग्री अर विद्यार्थियां ने भणार्ई–लिखाई री सामग्री दीरीजी। पाली जिला री गिरादड़ा स्कूल मांय ई वृक्ष चौपाल रा तहत 700 ऊं बत्ता पौधा रोपी ज्या। मुख्यमंत्री पौधारोपण अभियान 2024 जन जागरण कार्य योजना रा तहत जिला कलेक्टर एल एन मंत्री पौधा रोप र वां री सार–संभाळ रो जिम्मो दिरायो। हनुमानगढ़ जिला मांय टिब्बी री राजकीय महात्मा गांधी अंग्रेजी माध्यम स्कूल मांय अमृत महोत्सव एक पौधा देश के नाम ,एक पौधा मां के नाम अभियान रा तैत पौधा रोप्यी ज्या।

0000

राज्य मांय बच्चां रे खिलाफ अपराधां माथे काबू करण सारू पुलिस री ओर ऊं ऑपरेशन जागृति अभियान चलायो जा रह्यो है। ई रा तैत दौसा री रामकरण जोशी स्कूल मांय डीएसपी रवि शर्मा विद्यार्थियां ने पोक्सो कानून, गुड टच–बेड टच, साइबर अपराध, सड़कां माथे हादसां, देश मांय लागू व्ह्या तीन नुवा कानून अर यातायात नियमां ऊं जुड़ी खास जाणकारियां दीनी। जिला रा नांगल–राजावतन मांय डीएसपी चारुल गुप्ता ई न्यारी–न्यारी स्कूलां मांय बच्चां ने जाणकारी दीनी।

000000

सवाईमाधोपुर रा कलेक्ट्रेट परिसर मांय जिला रोजगार कार्यालय मांय 15 जुलाई ने रोजगार शिविर लगायो जावेला। शिविर मांय एक गैर सरकारी कंपनी री ओर ऊं सुरक्षा कर्मी ओहदा सारू इंटरव्यू लिया जावेला। इण मांय 18 ऊं 40 साल ताई रा मैट्रिक पास उम्मीदवार सिरकत कर सकेला। उम्मीदवारां ने दसवीं पास करण री मार्कशीट, आधार कार्ड, ऑनलाइन पुलिस वेरिफिकेशन, बैंक खाता री जाणकारी, पैनकार्ड अर पासपोर्ट साईज रा तीन फोटो ले र जावणो व्हेला।

00000

राष्ट्रपति रा हाथां ऊं शौर्य चक्र ऊं नवाजी ज्या मेजर राजेंद्र प्रसाद रो कोटपुतली-बहरोड़ जिला रा गिरुड़ी पूगण परां जोरदार स्वागत करी ज्यो। राष्ट्रपति भवन मांय राख्यी ज्या रक्षा अलंकरण समारोह 2024 रा तैत मेजर राजेंद्र प्रसाद ने शौर्य चक्र दे र नवाजी ज्या हा। ई मौके सैनिक कल्याण मंत्री कर्नल राज्यवर्धन सिंह राठौड़ मेजर राजेंद्र प्रसाद ने बधाई देता थकां कह्यो के वां ने शौर्य चक्र ऊं नवाजा जावणो सगळां सारू माथो ऊंचो करण री बात है।

00000

राज्य मांय आज ई केई ठोडां चोखो मेह बरस्यो। बांदीकुई अर भरतपुर मांय सब ऊं बत्ती 9 सेंटीमीटर बिरखा दर्ज करी ज्यी। चूरू जिला मांय ई आज चोखो मेह बरस्यो। अलवर मांय एक घंटां ऊं बत्ता बगत ताई व्ही बिरखा ऊं नीचला हलकां मांय पाणी भर ग्यो। जयपुर रा केई हलकां मांय करीब आधा घंटां ताई जोरदार मेह बरस्यो। जैसलमेर जिला रा मोहनगढ, सम, कुहड़ी अर चांधन समेत कई गांवां मांय आज बिरखा व्ही। दूजी कानी बारां मांय बिरखा नी व्हेवण ऊं उमस बध ग्यी। मौसम विभाग आज जयपुर, कोटा, भरतपुर, अजमेर, उदयपुर, बीकानेर अर जोधपुर संभाग मांय कठे-कठे बिरखा रा आसार जताया है। ई बीचे धौलपुर जिला रा नादनपुर गांव मांय नदी मांय डूब जावण ऊं 3 बच्चां री मौत व्हे ग्यी।

00000